



Jumat, 15 September 2023

**Ogen: Perbahenen Rasul 16:14b**



*Tutus Ersembah*



**E**rsembah asal katana sembah. I bas bentuk kata kerja, ertina mungkuk erjimpuh encidahken kehamaten. Biasana kalak si erjimpuh e teruhen tuturna entah statusna asangken si isembahna e. Bagi peradatenta kalak karo i bas nehken kehamaten man kalimbubu, nina rusur protokol: 'kita anak beru, si sehken kehamatenta man kalimbubunta, tungkuk kita kerina si sehken dage kehamatenta.' Anak beru teruhen tuturna asangken kalimbubu. Adi bas status umpamana, juak-juak nge si nembah tuanna. Engkai maka budak nembah tuanna? Erkiteken tuan e lit kuasana nandangi budakna, ia si mereken kecukupen geluh budakna janah ia si ngaturken pendahin budakna.

Bali konsepna ras kita nembah Dibata. Kita teruken asangken Dibata. Ia tuanta si ngaturken geluhta, si ncukupi kerina keperluan, si mereken kesah ras keselamatenta. Gedang-gedang wari kita ipekena-kenaNa. Labo nai ngenca Dibata e erkuasa tapi seh asa genduari. Seh ku kegeluhen jabunta ras ku pribadinta sekalak-sekalak IA erkuasa.

Bage me penandai Lidia nandangi Dibata, si ietehna arah pengajaren Paulus si reh ku kutana. Tutus kal atena megiken pengajaren Paulus kerna Jesus Kristus anak Dibata si nelamatkan geluhna. Erkiteken si e italangina pusuhna nandangi Dibata, tutus atena ersembah man baNa. Amin pe ia sekalak si sukses i bas erbinaga, igejapkenna e bekas pengaturen Tuhan. Meteruk ukurna, iposisienna dirina teruken asangken Dibata, iakuina maka Dibata e jadi tuanna si erkuasa nandangi geluhna.

Tutus ersembah e ngatakensa alu ratur teptep wari ersembah man Dibata. Alu mungkuk ertoto nehken kehamaten em wujud ersembah. La terjeng je ngenca nikapken diri ras isi jabunta ngelai Tuhan e pe bagin ersembah.